



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

## ICC ODI all-rounder Rankings nung Nabi-i Shakib ajatetogo

## Pakistan: Sorkar kumtettsü atema PML-N aser PPP longjemogo

VOL. XXI ISSUE NO. 123 (ADOK 123) DIMAPUR YANGTEPNÜ (THURSDAY) TSÜKLAI (FEBRUARY) 15, 2024 ₹ 5.00

## Eastern Nagaland CSOs-i draft Mos magizüker

Dimapur, February 14, 2024

(Agencies): Eastern Nagaland Gazetted Officers' Association (ENGOA)-i Dimapur nung rongdak senden ka ayonga amendang Memorandum of Settlement (MOS) magizüktü lemtetogo.

Iba senden nung Eastern Nagaland People's Organization (ENPO), Eastern Nagaland Legislature's Union (ENLU), Eastern Naga Students' Federation (ENSF) aser Eastern Nagaland Women's Organisation (ENWO) aden.

Osang angazükba agi Talk Team aser kin 8 hohotem iba senden nung maden.

"Senden nung adenertemi jungjunga olemtep aser ENPO den tanga tongti teloktem tebilemba angadanger MoS indang draft proposal magizüktü lemtet" ta ENLU Secretary, MLA Lima Onen

Chang-i ashi.

2011 küm Nagaland Legislative Assembly (NLA)-i Eastern region atema Autonomous Council ka shidangba ENPO-i magizük. Draft Mos nunga Arrla 371(A) (Regional Council System) aser State sorkari Autonomous Council mesüra authority shidangba agitsüla ta shia lir aser ibaji tesüiba mapang magizükba autonomous council lir, ta MLA Lima Onen Chang-isa ashi.

Iba draft nung autonomous council indang teimba shia lir anungji onoki ibaji magizüker, ta paisa ashi.

Külen, ENPO-ibo tanü senden nung draft MoS agizüktü atema olemtep maliasü ta ashir.

Onoki MHA-i ENPO nem indangindanga Original draft agütsü atar, ta ENPO lennir kati ashi.

## Kohima election ktdangsurtem dang EVM amshiyim sayu



February 14, 2024 nü Kohima DC & DEO Kumar Ramnikant IAS-i coordination meeting cum EVM Demonstration nung Sector Officers aser Commanders dang EVM amshiyim sayuba angur.

Dimapur, February 14, 2024

(TYO): 18 buba Lok Sabha, 2024 General Election atema Bodbarnü Kohima nung coordination meeting cum EVM Demonstration ka agiogo.

Kohima DC indang Conference Hall nung Assistant Returning Officers, Sector Officers aser Sector Commanders atema iba sentong ayonga amen.

"Tanü senden nung adenertem ya Lok Sabha election nung Election Commission atema tongtipangba nisungtem lir" ta Deputy Commissioner & District Election Officer Kohima, Kumar Ramnikant-i ashi.

"Sector Officers aser Sector Commanders kati ka amalitep alitsüla aser election tiptema agitsü atema inyaksüla" ta pai ashi.

Ktdangsurtemi pei pei

telongtet metettsüla aser sector shia semdanga election maparen nung tetsükdaksü ajurutsü aliba metetpelatsüla, ta Kohima DC-i ashi.

"Polling stations ajak nung powerline connection, running water, toilets aser PwDs atema facilities shitak renemtsüla. Nenoki EVM amshiyim kanga junga meteta alitsüla" ta paisa ashi.

Paisa ktdangsurtem dang temulung agüja inyaksü aser bangdak Assistant Returning Officers nem mapang shia reports agütsü ayongzük.

Iba sentong nung District Level Master Trainers (DLMT) Er. Imsunger, EE, CE PWD aser Pikato Jimmo, Dy. Director, Directorate of Agriculture nati Electronic Voting Machine (EVM) amshiyim sayua liasü.



Feb 14 nü Union Minister of State for Steel & Rural Development, Government of India, Fagga Singh Kulaste tayimtsü nungi Mokokchungi aruba mapang Mokokchung Assam Rifles Helipad nung pa agizükdang tangokba noksa nung angur. Feb 14 aonung pa Mokokchung nung yipzüksü aser Feb 15 nü department tokolakpur (HoDs) aser Centrally Sponsored Schemes (CSS) department-tem den senden amentsü, iba sülenji Ungma yim semdanga Self Help Group (SHG) balala den sensaksem ka akatsü aser yang nung jagi Kohima yimtiba yima aotsü, ta osang angazüker.

## CM Rio-i sorkar school tem ajungkettsü ayongzük

Kohima, February 14, 2024

(TYO): Sorkar school tem nung shisaliok jenjang mejungi akümba ya asenok ajak tamakok lir anungji asenoki tesüiba ama sorkar school tem ajungkettsüla ta Nagaland Chief Minister Neiphiu Rio-i ashi.

"Sorkar school ajak nung tesayur tajungtibatem shimeer. Ajisüaka sorkar school tem nung shisaliok jenjang mejungi akümba asenoki nguogo. Iba ya külem tamakok ka lir aser asenok longjemer tesüiba nung ama sorkar school tem jenjang temabai ajungkettsüla" ta CM Rio-i ashi.

Kohima district kübok Government High School, Meriema tasen lapokba sentong nung pai iba tayongzükba agütsü.

Sorkari tazüngertem tajungtem tesayur inyaksü shimer aser nija school tem dang nungi itasen teimba agütsür saka results kanga majung, ta pai ashi.

"School upgradation dak sendakba maparen aika lir saka 2001 census mapang nisung talila akümba ajanga sorkar school aika lapok aser tesayurtema aika

shimok. Ajisüaka Advisor Kekhrielhoulie Yhome lenisüba kübok department-i bushitepa aodang asangsang osang ngutetogo. Nisung aikati iba osang magizüker aser mepelar saka maparen tiptemtsü imlar" ta CM Rio-i metetdaksü.

School aika nung nil enrollment mesüra single digit students lir aser kaketshirtem dang nungibo tesayur teimba aliba bushitetogo. Külen, school kar nungbo tesayur meperir. Iba jagi department-i tesayurtem lemsashiba maparen inyaker, ta Rio-i ashi.

Department nung aibelentemji sorkar kijai dang metongshitsü makok saka sendaktepa alirtem, department ktdangsurtem aser yimtsüng leninirtem longjemer inyaksü nüngdaker, ta paisa shisem.

Nagaland nung literacy rate 80% jungnüa lir saka skill-based knowledge maliba ajanga graduate asür aikati mapa mangur ta CM Rio-i ashi.

"Kaketshirtem akhangba ama direct appointments ajak anenogo aser Grade IV appointments

atema NSSB ajanga dang inyaker. Anungji sorkar school tem Centre of education tajungtiba kümdaktsütsü merangba nung nisung ajaki yariteptsü ayongzüker" ta pai ashi.

SDEO, Chiephobozou kübok kaketshir teimtiba alibaji GHS Meriema lir aser Nectar Nagaland project mezüngbuba batch nung shimogo, ta CM Rio-i metetdaksü.

"Nagaland nung GHS 247 lir aser iba nungi Kohima nung 47 lir. Northern Angami-II nung GHS 6 lir anungji asenoki item school tem ajungkettsü atema merangtsüla" ta School Education & SCERT Advisor Dr. Kekhrielhoulie Yhome-i ashi.

Sorkar school tem nung kaketshir 1.5 lakh shi azünger aser nija school tem nung kaketshir 2.59 lakh shi lir. Nagaland nung aliba nija school tem nung Rs 600-700 crore shi endoker, ta paisa ashi.

Tsüraburtem rongsen tsütsü khuret ajuruba ajema kümdaktsütsü atema sorkar school tem tajungba akümtsüla, ta Dr. Yhome-isa metetdaksü.

## Class 12 question paper temai adokba bushisüngdangtsü akhanger

Dimapur, February 14, 2024

(Agencies): HSSLC tatidang nung English question paper temai adokba bushisüngdang ta takhangba agüja kaketshirtemi online petition ka tenzükogo.

Bodbar aonung 9:00 ako tashi nung iba online petition nung 1,163 signatures ngutetogo.

February 12, 2024 nü Nagaland Board of School Education (NBSE)-i ktdangsüa agiba HSSLC tatidang mezüngbuba anogo nung English agia liasü.

English question paper nung total 80 marks nungi 50 marks

tema indang questions tatidang agitsü anogo ka jelia social media nung prokshi. Nisung shingaia English questions yamai indangindanga meshitetsü ta online petition tenzükertemi ashi.

Idioms and phrases 160 tema aliba kaket ka nungi idioms and phrases 3 kasa shitetba ya tim masü. Ano social media nung prokshiba Multiple Choice Questions (MCQs) aser question paper kasa dang liasü ta parnokisa ashi.

"Ano writing section nung questions kasa dang liasü. Iba ya question paper yangluri dang

shitetsü anungji iba ya question paper temai adokba ken o ka lir" ta kaketshirtemisa metetdaksüogo.

Parnoki Higher Education Minister Tenjen Inma Along aser NBSE dang bushisüngdang tajung ka asütsü aser tatidang timi agitsü tenangzükba meraksatsü ayongzükogo.

Question paper temai adokba tesayur aser iba nung sendaktepa aliba kaketshirtem merenshitsüla. Kaketshirtem tanaben English subject agütsüdadaktsütsüla mesüra marks reprangshimtsüla ta online petitioner temisa metetdaksüogo.

## New Delhi nung 'Vividhata ka Amrit Mahotsav' sentong temogo



**Dimapur, Tsüklai/February 14 (TYO):** Northeast India 'tapestry' talubosa aliba temaba jenjangi ajungketsü nükjidong nung ayongzükba 'Vividhata ka Amrit Mahotsav' sentong Rashtrapati Bhavan, New Delhi nung sentsüpranga mungtetogo.

Küm ana nung khen amungtsü aliba 'Vividhata ka Amrit Mahotsav' mezüngbuba sentong ya India Tir Droupadi Murmu den Cabinet Minister G. Kishan Reddy, Minister of Tourism, Culture and Development of North Eastern

Region of India; Kiren Rijju, Minister of Earth Sciences nungertem lia tenzuka liasü.

Iba sentong nung North East India nungi Parliament züngsemtem, Governor tem aser Cabinet Minister tem aser lenla balala nungi sorkar ketdangsurtem dena liasü.

Tir Murmu-i iba sentong nung shilem agirtem Rashtrapati Bhavan-i pela jaoka jembidang Rashtrapati Bhavan nung North East India indang tapestry külemi atakba asoshi sentong ayonger nem tenüngsang agüja liasü.

Laisa nüburtem dang maneni North East India nung sobaliba, yimyakoya aser alinük balala repranga jajatsü ajungshia liasü.

Iba sentong ya Ministry of Development of Northeastern Region tawabangba kübok CPSE, Northeastern Handicrafts & Handlooms Development Corporation Limited (NEHHDC) ajanga ayongzuka liasü.

Iba sentong ya Udyan Utsav 2024 nung shilem ka ama Rashtrapati Bhavan telung nung aliba Amrit Udyan nung ayongzuka agia liasü.

## Tang ya Lok Sabha nung Naga BJP candidate ka shimtsü mapang lir: Hayithung Lotha

**Dimapur, Tsüklai/February 14 (TYO):** India nung 2024 general election nung BJP-i takok angutsü ya tejangja lir.

December 2023 nung state tulu asem nung election agiba nung Bharatiya Janata Party (BJP)-i takok angu aser Ato Kilonser Narendra Modi-i 2024 election nung takok ngua asem ben atonga sorkar kumtetsü takzütetogo, ta Hayithung Bill Lotha, Ex. NPP MP Lok Sabha candidate 2019 ajanga sangdong ka nung ashi.

Tang India nung yimten yimsüsüba tsütsü political analysts aser poll pundits temi ashiba agi, Modi aser BJP-i takok angutsü kanga langa lir.

Lok Sabha menden 543 aliba nungi Nagaland nungi züngsem ka dang lir aser aji züngdangba tsütsü tashi kangabo mali, ta pai ashi.

2004 nungi Lok Sabha atema asen state election asadanga, election pongu - 2004, 2009, 2014, 2018 aser 2019 - nung Naga nungeri regional party nungi dang shima arur.

Kümsük pongu nungya Lok Sabha nung asen regional party nungi züngsem temi parnok itasen agizüka agiba, Lutyens lane nung sorkar indang ki ka



Hayithung Lotha

nung aliba, peon ka aser PA ka allowance den dangar ama state ajunga atema MPLADF nungi sen crore pongu agizükba dak alaka terenlok atema central funding kecha bener marutet mesüra danga ken o nunga shilem magitet, ta Hayithung Lotha-i ashi.

Tangya Naga nung lungjemer ajaki mulunga Naga BJP candidate ka Lok Sabha MP ama 2024 nung yoktetra, yangji Naga nung asoshi tongtipang tajangzük asem alitsü.

Mezüngbuba nung, ibaji ajanga asen state chief minister jenjang tajungba akumtsü aser

linük sasep nunga Naga BJP LS MP political weight taretba akumtsü, ta pai ashi.

Tanabuba nung, iba amala MP ji Modi 3.0 cabinet nung shimoktsü teimla tulu lir, kechiaser küm 50 dak tema Naga nung kata center nung cabinet inyaka mali aser Indo-Naga political solution tatembangba züluteptsü mapang ka nung Naga nung BJP nungi Lok Sabha MP alitsüji kanga tongtipang asütsü.

Tasembuba nung, Naga BJP LS MP jaki central ministry balala nungi teyari maparen bener aruba nung shilem tulu agitsü aser state aser centre nung 'double engine' sorkar jenjang tajungba nung animesotsü, ta Hayithung Lotha-i ashi.

Ato Kilonser Narendra Modi ya century 21 buba nung India indang PM tajungtiba lir aser pai temulungtetba tulu nung inyakba ajanga India ya 2047 tashinung developed nation ka kumdaktsütsü.

Anungji Congress, RPP aser LJP (RV) dang külemi amteper ajaki mulungba Naga nung candidate ya yoktsü ayongzük, kechiaser iba ama candidate kati takok angubaji tajangzük tulu asütsü, ta paisa ashi.

## Block Task Force senden nung routine immunization indang jembia

**Dimapur, Tsüklai/February 14 (TYO):** Indian Social Responsibility Network (ISRN) ajanga February 13, 2024 nü Jakhama nung aliba SDO Civil indang office nung Block Task Force senden ya ayongzuka liasü.

Iba senden ya routine immunization tali tajungba nung agütsütetsü asoshi lenmang bushitsü nükjidong nung ayongzuka liasü.

Iba senden nung menden Nockpai Konyak, SDO Civil, Jakhama liasü aser pai tanurtem nem immunization aser

vaccination agütsütsü kota tongtipang ta asüba indang jembia liasü.

Communication Officer, Rose ajanga Jakhama block nung project inyakyim balala indang lemsatapa.

Lai lokti tentet balala dang project team yaria immunization atema awareness aser sensitization sentongtem agitsü ayongzuka liasü.

Laisa ISRN ya state sorkar den lungjemer USAID teyari nung MOMENTUM Routine Immunization Transformation and Equity (M-Rite) program

mapa kuma inyaker ta ashi.

Community Health Centre, Viswema nung Medical Officer, Dr Medophretuo-i vaccination aser immunization ajanga tajangzük anguba indang lemsatapa liasü.

CDPO Jakhama, Zubemo Jami-ia immunization atema tasa balala iba sentong nung lemsatapan liasü.

Iba senden nung NGOs nungi ketdangsurtem, Jakhama Village Council chairman aser sendaktepa aliba department tem nungi ketdangsurtem dena liasü.

OFFICE OF THE  
**LANGPANGKONG TZÜKONG MUNGDAK**  
H.Q. Chuchuyimlang - 798614  
Dist. Mokocheung, Nagaland.  
ESTD. 1933

Ref. No. LTM/PS/24/51/2024 Date: 15.2.24

**LTM SANEN LUDEN SENDEN AYONGER**

Tongtipang ken o tulu aika jembitsü alinung **23rd February 2024 (Friday)** anogo Sanen Luden Senden anepdang **11: 00 ako** Tzükong Salang HQ Chuchuyimlang nung akatsü ayonger. Anungji Yimtsüng aser Jila ajak nungi **Village Council Chairman / President** aser **Sanen Luden** züngsem den **Tzükong Advisor Board** aser asen Tzükong meyonga **Ao Senden Tongror Luden aser Sanen Luden** ajak medema arua adentsü metetdaktsür.

Külem Tzükong Wadang nung tenzükur :

Sd/-

( Wb. MARSANEN IMSONG ) ( Wb. R. NUKSHI LONGKUMER )  
President LTM Gen. Secy LTM

## Y. Patton-i SDPO Akuluto atema nüngshilong azüngtsü



Deputy Chief Minister aser Minister in-charge of Home and Border Affairs, Y. Patton-i February 14, 2024 nü Akuluto Sub-Division nung Sub-Divisional Police Officer (SDPO) indang office yanglutsü atema nüngshilong azüngtsüba mapang tangokba noksa ka yangi angur

**Dimapur, Tsüklai/February 14 (TYO):** Deputy Chief Minister aser Minister in-charge of Home and Border Affairs, Y. Patton-i February 14, 2024 nü Zunheboto District kübok Akuluto Sub-Division nung Sub-Divisional Police Officer indang office yanglutsü nüngshilong azüngja liasü.

Iba sentong nung jembidang, nüburtem ajungtsü mechi kanga nüngdakba mapang iba project tenzükba atema Patton-i Advisor Kazheto Kinimi nem tenüngsang agüja liasü. Tarutsü anogotem nunga pai terenlok asoshi nüburtem nüngdakba nung yariteptsü ashi.

Akuluto nung SDPO post amenoktsü asoshi maparen tekeraba nung inyakba atema Advisor Kazheto-i Deputy Chief Minister Y Patton dang pelaba

lemsatapa aser Nagaland Police indang puti otsü nung ibai alizüng tasen ka alitsü ta ashi.

Iba sentong nung SP Zunheboto, Kupe Kapfo, NPS ajanga tarur pela agizükba o jembia aser Chairman Adhoc Town Committee Akuluto, Vikheho Achumi; President Akuluto Area GB Association, Ghotokhu aser DIG Range Kohima, Rotihu Tetseo nungeria o tatsütsü jembia liasü.

Iba sentong nung SDPO Akuluto, Meyiakum, NPS menden liasü aser Addl. SP Zunheboto, Vekhrola Koza, NPS ajanga melepzüng o jembia.

Sentong nung Lumitsami village nungi tetsürtemi sobaliba ken ka aten aser Sutemi village ajanga sobaliba tsüngsang ka ajanga shilem agia liasü.

75  
आज़ादी का  
अमृत महोत्सव

पेंशन निधि विनियामक और विकास प्राधिकरण  
PENSION FUND REGULATORY AND DEVELOPMENT AUTHORITY

75  
Azadi Ka  
Amrit Mahotsav

**PENSION FUND REGULATORY AND DEVELOPMENT AUTHORITY**  
B-14/A, CHHATRAPATI SHIVAJI BHAWAN, QUTAB INSTITUTIONAL AREA,  
KATWARIA SARAI, NEW DELHI - 110 016.

**VACANCY ATEMA METETDAKTSÜR**

Küm asem atema contract/Deputation nung Chief Executive Officer (CEO) National Pension System Trust (NPS Trust), New Delhi, koba ketdangsurtemi temulung süra ano küm ana atema atsülangtsü koka lir, iba atema India nungertem application jaoker. Ken o dak sendakba nung eligibility criteria, mapa atema shimba yimya, emoluments aser application form amala PFRDA's website [www.pfrda.org.in](http://www.pfrda.org.in) aser NPS Trust's website, [www.npstrust.org.in](http://www.npstrust.org.in) aser ano National Career Service [www.ncs.gov.in](http://www.ncs.gov.in) nung angutsü.

Mapa dak sendakba nung Corrigenda/Addendums/Notice (kar danga lira) ajak PFRDA/NPS Trust nung angutsü.

Application agizütsü atema tatembangbuba anogoji April 04, 2024 (Thursday) asütsü.

Sd/-  
**CHIEF GENERAL MANAGER**  
HR Department

Please visit our website [www.pfrda.org.in](http://www.pfrda.org.in) for complete information or scan the QR code



February 14, 2024 nü New Delhi nung Delhi Lt Governor VK Saxena, Chief Minister Arvind Kejriwal aser Transport Minister Kailash Gahlot nungeri electric bus 350 tenzüksüdü tangokba noksa nung angur.

### Rajya Sabha election atema BJP aser Cong-i candidates sangdong

**New Delhi, Tsüklai/February 14 (Agencies):** Bodhbarnü Bharatiya Janata Party (BJP) aser Congress party napronglai February 27 nü agitsü aliba Rajya Sabha elections atema candidates tenüng kar sangdongogo.

Bodhbarnü BJP-i Rajya Sabha election atema ano candidate tenet tenüng sangdong; BJP National Tir, JP Nadda-i Gujarat nungi tokteptsü aser tang tasen shimba party lenir Ashok Chavan-i Maharashtra nungi tokteptsü.

BJP-i Gujarat nungi tokteptsü atema Govindbhai Dholakia, Mayanbhai Nayak aser Jashvantsinh Parmar nungera shimogo.

Maharashtra nung BJP-i Chavan den Medha Kulkarni aser Ajit Gopchhade nunger shim. Taoba mapang Maharashtra chief minister, Chavan-i tan hopta tetenzüklen Congress toktsür BJP nung adenba sülen BJP-i Rajya Sabha election nung tokteptsü atema pa shimmer.

Tang BJP Tir Nadda ya Himachal Pradesh nungi Rajya Sabha MP lir; taruba election nung pai Gujarat nungi tokteptsü, kechiyong Congress-i yimsüsüba Himachal Pradesh nung takok angutsüsa BJP züngsem peria mali.

BJP-isa Odisha nungi tokteptsü atema Union minister Ashwini Vaishnaw aser Madhya Pradesh nungi

tokteptsü atema L Murugan shimogo. Amongnüa BJP-i Rajya Sabha election atema taoba mapang Union Minister R P N Singh aser party otongdar Sudhanshu Trivedi na densema candidate 14 tenüng sangdonga liasü.

Ano külen Bodhbarnü Congress-ia Rajya Sabha election atema Karnataka, Madhya Pradesh aser Telangana state tem nungi candidate trok sangdongogo.

Karnataka nung All India Congress Committee (AICC) treasurer Ajay Maken den Rajya Sabha MP Syed Naseer Hussain aser GC Chandrashekhar nungeri tokteptsü. Madhya Pradesh nung Ashok Singh aser Telangana nung taoba mapang MP, Renuka Chowdhury aser Anil Kumar Yadav nungeri tokteptsü.

Bodhbarnep Congress Parliamentary Party Chairperson, Sonia Gandhi-i Rajasthan nungi tokteptsü atema nomination file süogo. Nomination file asüdüng la den Party MP Rahul Gandhi, party general secretary Priyanka Gandhi Vadra, taoba mapang Rajasthan Chief Minister Ashok Gehlot aser state party Tir, Govind Singh Dotasra nungera liasü.

All India Congress Committee (AICC)-i sangdong ka ajanga, "Rajasthan nungi Sonia Gandhi aser Bihar nungi

Dr. Akhilesh Prasad Singh-i tokteptsü atema Congress Tir Mallikarjun Kharge-i agizükogo," ta metetdaksü.

Congress nungisa Abhishek Manu Singhvi-i Himachal Pradesh nungi tokteptsü aser Chandrakant Handore-i Maharashtra nungi tokteptsü.

Rajya Sabha MP tem kümsük ya küm trok lir, aser küm ana shia menden shilem 33 atema election agir. Tang Rajya Sabha nung züngsem 245 lir.

Sonia Gandhi ya küm 22 jungnüa Congress Tir inyaka liasü. La Uttar Pradesh kübok Rae Bareilly nungi Lok Sabha MP kümsük (term) ponguben inyakogo aser tang mezüdüng lai Rajya Sabha election nung tokteptsü.

Taruba Rajya Sabha election nung tokteptsü atema tenüng agütsütsü asoshi anogo tatembangbubaji February 15 lir.

Tang Rajya Sabha nung züngsem 245 nungjagi züngsem 233 bo States aser Union Territories of Delhi, Puducherry Jammu & Kashmir nungi lir aser züngsem 12 bo linük Tiri shimmerem lir. Rajya Sabha nung züngsemtemji state tem nung nütsüdüng sasep nung lemsüktsür.

February 27 nü anepdang 9:00 ako nungi tenzüka nikongdang 4:00 ako tashi vote agütsütsü aser kasa anogo nungjisa election agiba osang sangdongtsü.



Patna February 14, 2024: Bodhbarnü Bihar Assembly nung BJP candidate, Daramshila Gupta-i Rajya Sabha elections nung tokteptsü atema nominations file asüdüng tangokba noksa nung angur. Kasa noksa nung Bihar Chief Minister Nitish Kumar den Deputy Chief Minister ana- Vijay Kumar Sinha aser Samrat Chaudhary nunger angur.

### Police-i longkak aiter aluyimertem azüoktsü atema 'tear gas' amshi

**New Delhi, Tsüklai/February 14 (Agencies):** Bodhbarnü Punjab-Haryana Shambhu arrtsülen longkak aiter aluyimertemi Delhi telungi aittsü merandang parnok nokdangtsü atema Delhi police-i tear gas amshi.

Bodhbarnü aluyimertemi 'Dilli Chalo' kübok longkak aitba mapang aluyimertem senshidaktsütsü atema police-i 'drones' ajanga tear amshi aser arrtsülen aluyimertem aika apu.

Aluyimertem longkak aitba nokdangtsü aser Delhi telungi maitdaktsütsü atema Punjab aser Haryana arrtsülen security akangshia liasü.

Aluyimertemi Centre sorkar dang Swaminathan Commission report ajanga benoka aliba ama minimum support price (MSP) atema ozüdüng ka yangluang, ta takhangba agütsüba den külemi taoba mapang longkak aйдang aluyimertem anema benoka aliba ken o ajak agientsü, arrshi küm 60 ser temapur aluyimertem aser alu nung aayangertem nem pension agütsütsü atema scheme ka tenzüksü aser Uttar Pradesh kübok Lakhimpur Kheri district nung aluyimertem mentüngsetba tatalokba nung aibelenertem nem temerenshi agüdüng, ta takhangba agüja longkak aiter.

Aluyimertemisa Electricity Amendment Bill 2020 agientsü aser Land Acquisition Act of 2013 ozüdüng tanaben benoktsü akhanger.

Aluyimertemisa Mahatma

Gandhi National Rural Employment Guarantee Act, 2005 (MGNREGA) scheme kübok küm shia aayangba anogo 200 asütsü, anogo ka taaji sen 700 asütsü aser 2021 küm longkak aйдang asüba aluyimertem kibongtem nem senotsü teyari agütsüba den kibong nung züngsem ka nem mapa agüdüng, ta takhangba agütsür.

Tensa azüoktsü atema Delhi police-i Section 144 ozüdüng benoka lir. Iba ozüdüng kübok lokti tulu adenshitsu memelaba den külemi tractor trolley Delhi telungi aittsü memelar.

Aluyimertemi Ambala-Shambhu, Khanauri-Jind aser Dabwali arrtsülen nungi Delhi telungi aita longkak aittsü sentong lir. Haryana kübok district tenet nung internet services nokdanga lir aser Panchkula o Chandigarh na nunga Section 144 ozüdüng benoka lir.

Aluyimertemi Centre sorkar nem takhangba onük 12 agüja Delhi telungi ia longkak aittsü meranger. Punjab, Haryana, Uttar Pradesh aser Karnataka densema state balala nungi aluyimertem meyirjang aika Delhi arrtsülen adenshia lir.

Longkak aitba sentong ya Sanyukt Kisan Morcha aser Punjab Kisan Mazdoor Sangharsh Committee nati ayongzük aser aluyimertem union nungi lenir ana- Jagjeet Singh Dallewal aser Sarwan Singh Pandher na leniba nung longkak aiter.

### PM Modi-i Abu Dhabi nung Hindu nunger tekülem ki semzüktsü



February 14, 2024 nü Abu Dhabi, UAE nung Ato kilonser Narendra Modi aser Madagascar Tir, Andry Rajoelina na senden amendang tangokba noksa nung angur.

**New Delhi, February 14 (Agencies):** Bodhbarnü Abu Dhabi nung Ato kilonser, Narendra Modi-i Hindu nunger tekülem ki ka semzüktsüogo; iba tekülem ki ya Bochasanwasi Akshar Purushottam Swaminarayan Sanstha (BAPS society)-i asü.

Bodhbarnü iba tekülem ki meshitetba sülen Modi-i semzüktsü.

Ali acre 21 nung asüba tekülem ki ya Abu Dhabi nung mezüdüngbuba Hindu nunger tekülem ki asütsü aser UAE nung aliba tekülem ki tulutiba rongnung tanabuba.

2022 küm October ita nung UAE Minister of Tolerance, HH Sheikh Nahyan bin Mubarak Al Nahyan-i Dubai nung Hindu nunger tekülem ki semzüktsü liasü.

Abu Dhabi nung tekülem ki

asütsü atema UAE sorkari ali tenla agütsüba sülen 2019 küm foundation lung azüdüng liasü.

Iba tekülem kidang prayer hall ka lir; iba hall nungji nisung 3,000 tashi mentettsü. Iba tekülem kidangsa community centre ka, exhibition hall ka, kaketnang ka aser Children's park ka lir.

Mongolbarnü Narendra Modi, UAE tonga ao. Pa UAE tonga aoba mapang nung yangji aliba sensotemi pa agizüka liasü. 2014 küm nungi tenzüka tang agi tenetbenbuba pai UAE semdang.

Modi-i semdangba mapang nung UAE aser India na tsüdüngda energy, ports, fintech, digital infrastructure, railways aser investment densema sector aika nung amalitep jenjang tajungba akümsü atema jembio.



## TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 15, 2024

### Nia polashia lao lir !

**A** khidang asen lima kaketreju nung Ao Tazüngtsü kaket ka azüngertemi azüngba tsüngen otsü ka nung, kenü anogo nisung ka ayongküm nung long ajak meküpdoka tsüngen puyonga ao ta ashir. Iba mapang nisungba jagi tsüngen ka jenoka alidak long tukuka meküpdoker tsüngenji aputsü lia, tsüngen jagi long dangji 'obou ni kümzü kang' ta ayimtena mepishiba angashir, long jagi tsüngen dangji 'oboulaa polashia lao lir' ta ashiba ama, tanü nübertemi government nung alirtem dang teyari meshitsüla masü, parnokang timtatemba aser tuokrongba, Anungji kechianga mashir. Aji oda, nübertemi government kübok department-tem dang nungdak kar asüngdangra, nungdakji ataloktsü indang masü saka mataloktsüba indang kuliang aika ashitsü. Tanü Nagaland nung nübertem asoshi nungdakbatem rongnung tenüngdaktibaji electric light ya lir, kechiyong tanübo asen lima nunga electric power ya tesangwa asoshi dang masü saka soruchiokba nungi shir business aser office mapa ajak electric tashi agidang inyaker. Ajisüaka, Nagaland nung electric tashi nungdakba dang nungi tesadanga magütsüteter. Industry lapoka business inyaksü atema nungdakbajibo yutsür, tang ama kaketshirtem tatidang agidang aonung tesangwa kisüng asoshia asen government-i asenok nem light tashi peria magütsütet timtemba ajangshir. Iba timtemji koktettsü atema government dang light tashi peria agütsütsüla ta nübertemi ashidang, tang ama takong mapang tzü rosepa agi light tashi magütsüteter aser linük nung ali mijang rong light adokdaksüba thermal power-tem shibangba agi light peria mangur ta ashiba kulitemji tsüngenji teimla tulu agi tebou dang teyari meshi nung teboui 'nia polashia lao lir' ta langzüba tensa tia amai lir. Joko, tsüngenja pi aonpui aitsü aser longjia tagidak maka kuma aotsü. Iba otsüji toktsür asenokbo asenok polashia lao aliba nungi saker kodaser tsüngen kaji dang masü saka tsüngen ajak yaritettsü ta asüba tangatetba nung khen ajungshitepa inyaksü junger. Asenoki tang tashi asen state merenloktetba ya yimten tebilemstü indang jembia jajar telongpurtem dak atonger, saka asenok tajung kümnüseta mekümtet timtemba ya telongpurtem masü saka asenoki asen nungdak peria electric power madokdaksütetba ajanga lir. Iba kuliji yakanü Kohima nung Small Industries Development bank of India (SIDBI) purtemi nübertem nem senotsü apuja yaritsü asoshi sentong ka lapoktsüba mapang Development Commissioner, Ramakrishnan-i tangalen nungi takartemi pei sen bener arua Nagaland nung mapa inyaker saka parnok asoshi tebilemstü tulutibaji electric power peria manguba timtem ya lir ta metetdaksüabaji asütsü. Iba tebilemstüji koktettsü atema Nagaland Power department-i lenisüba sentong tajung yanglua inyaksüla aser idakji nübertemi nungita shilem agitsüla. Iba tebilemstü koktettsü atema tamasa Power department nung inyakerteri anir nübertem ajaki light atsükba nung kanga ochishia inyaksüla aser meyaka agitsüla. Aji oda, senso shiai akok tashi light ajema atsüktsü merangtsüba dak alaka light tashi auyaa magitsüla. Iba amaji senso shiai state nung light tashi ajanga terenlok mapa tulu inyaktetsüsa pei akok shilem agia alidang, power department-i Nagaland nung küm 5 mesüra ter tsüngdangbo light peria angutsüsa light adokdaksütsüba sentong tenzüksüla. Atangji, asenokibo tangar tejakleni aoba ya arishiaka memeneper, kechiyong tangarbo anü tashi atsüzüka mapa inyakba putu lir. Asenokia itemji ajizükabo inyaker saka tagitsü inyaksüsabo asenoki metenzüktetter. Itemji, tapu aika bilemyonga, kijaibo tuluka meinyakettsü saka yimkong nungdak peria hydro power süli, solar power süli adokdakja inyaksüabajibo government mapa lir. Tanü putu nungbo light tashi magütsü ser lanurtem dang mapa inyaksü ajungshitsüabaji prangpong injang magütsü ser tongpangi odaktsü amai lir. Aji asen government-i angatetogo ta bilemdi.

## OLEMSABANG

### SARASADEM TESEP KOMA ASÜ NUNG TAJUNGBA SÜLA

Rev. Dr. Limatula Lkr.

(Yashi adok nungi...)

#### Shirnok Sarasadem tesepe aor?

Prayer centre tangatetba tsütsü nungi reprangdangra, arogo nung asenok telok asem kümogo. Mezüngbuba telokji prayer centre nung dang temulung alemba aser temulungsentsü ajak agi bendanga yariba. Ashiko, item nüburtemji pei mother church toktsür prayer centre-i ang teimba aoba nüburtem asütsü akok. Item nüburtemi arogo inyakyim aser sayutsüngiba yimya nungji temulung mesüi alitsü akok, aser temulung masüba indang jembibaji angur. Tanabuba telokji 50- 50, tetezü nungdak mapang nung prayer centre-i aotsü saka arogo nunga member tajung ka ama regular sentepi oa shilem agiba telok lir. Asembuba telokji kodanga sarasadem tesepe-i maor, prayer centre anema meinyaker, saka temulung nungbo prayer centre-ji keta sena mebilemer saka arogo benjatsüba telok ka amai bilemya alitsü akok.

Nisung telok lemsaba den külemi arogo rongsen-a lemsar ta metetdi. Arogo asüyonga, sarasadem tesepe asüyonga tamang tenla agi jajaba telungjem tentet asünung tamangtir-i mulungsoa agütsüba tenla agi taküm liteper ta metetdi. Asenok joko arogo rongsen (sources) lemsaogo, sarasadem tesepe karbo takar-tuluri rongsen jenti agüja terenlok aoba osangtem angashir. Prayer centre karbo India lima tesem aika nung mesem-a aoba osang angashir. Oda lia liabo arogo nunga telemsa adoktsü menua mali. Tamanger ajaki iba atema shi shia bilemstüla.

#### Kechiba Sarasadem Sepi aor?

Ashiko kuli aika alitsü akok. Aika shi aser tanela nung tanebtsü asoshi, timtem-khuret mapang nung telangzüba (answer) tangsa tang metetnüba agi sarasadem dangi aor. Shirnok sarasadem sepi aor parnok nungdaktemji: exam nung takok angutsü, mapa angutsü atema, competitive exam nung takok angutsü, kibong akümstü, election nung takok angutsü, temenen aridoktsü, yi jemer, mozü achir azüoktsü, miim mozü katitsü, shisabulu khuret, tashitak tapu aika bener tanebtsü bushia arur. Arogo nung Pastor (toklang tenzüker) dangi masü teimba kati prayer centre bushia item sarasadem onük balala bener senteper. Ya kechiba? Arogoi nübur tanela aser shi nung anisüngzü angutsüsa meyaritetter asu? Arogo tenzüker dak temulung malemer asü? Mesüra tanela sempet akar bushia sarasadem sep jagi aor? Prayer centre nung tanebtsü, aser sayatenya mapa aika inyakba osangtem kuli aika lir. Tsüngremer sayatenya tatalokba aika lir asünung iba ya nisungtem asoshi phuatsü telok ka asü? Asen nisungi tangsa tang telangzüba aginer. Mangdang aser shiner dang Tsüngremi kechi tuyur ta asüngdang. Anungji shiner aser mangdangertemji tia ashir amai Tsüngrem ama kümdaktsür. Asen kija tamang Tsüngrem dak ayuba masü mangdangertemji asen Tsüngrem kümdaktsür.

#### Prayer Centre inyakyim yimya

Pastor Bendangmeren, Kohima-i züluba ocet ka nung Prayer Centre 11 (ter ka) tashi lapoka aliba küm ter sür ta tejaklen shisema lir (Laishir Ola Kümstük XXXI, 2009: 23-27). Tangbo Nagaland nung prayer centre aika kümogo, aser aji Dimapur area nung teimba ka alitsü südi. Kechiba Prayer Centre paika ya lapokyonga aor? Ya nüburtem onsara nungtepa aoba agi (demand) tali tali lapoka aor asü, mesüra Tanela Temeshi lenisüba mesüra ajongshiba ajanga lapoker, mesüra iba ya sen aatsü (lucrative industry) ka akümer? Sarasadem tesepe lapokba aser inyakyim ya alima aika nung mesüktepa angutsü, tongmelang agi Neo-Pentecostal movement tsütsü nungi inyakyim kar asen lima sarasadem tesepe den medemdanga zülusemer.

\* Prayer centre ya tebilemstü khuret pungtokdak (problem solving centre) ka ama lir, aser sarasadem tesepe kibur aser counsellortemji tebilemstü khuret tanebtsürtem (problem solver) amai lir. Sarasadem tesepe nung counsellortemji nisung aser Tsüngrem tsüngda o tongdar ama (spokesperson) inyaker. Nüburtemia sarasadem tesepe arubaji tanelai kechi ashir ibaji tangsa tang metetnea asüngdangyar; aser Tsüngremer tetuyuba aser telangzüba kechi metetnea arur.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## 'Experiencing God' kaket zülusang, Henry Blackaby süogo



Henry Blackaby'er kibong noksa nung angur.

**February 14, 2024:** 'Experiencing God' kaket densema Khrista nütsüngsüba kaket aika zülusang, Henry Blackaby February 10 nü alima nungi pilaogo; pa arrshi küm 88 liasü.

Par jabaso, Ricgarh Blacaby-i, "Pai nuklai arua yongyaba ama tang pai Tsüngrem den aika ajangshidar. Ozü tsürabur tanela tsütsü tebuti ka asüba onok atema maongka liasü," ta ashi.

"Experiencing God" kaket ya (English oshi nung) copy million 8 dak tema ayok aser iba kaket ya oshi 75 nunga meyipzüka adokogo.

Henry Blackaby ya pastor tem, missionary tem aser Khristan lenirtem aika atema tesayur ka liasü.

Texas Baptist Men (TBM) Executive Director, Mickey Lenamon-i, "Henry Blackaby-i Tsüngremi mapa inyakba tesem jangjaba aser pa TBM nung adenba ajanga küm aika TBM ajangzükogo. TBM ajang Tsüngrem tenzükba wadang inyakyim kanga melenshiogo aser nungdakba mapang nung volunteers-i teyari balala agütsür," ta metetdaksü.

"Alima tesem balala nung Khrista sülen anidakertem nem tashi agütsütsü atema pai tesayuba agütsüba atema onoki pa dang pelar. Pa indang ministry ajang nisung million aikati Tsüngrem temeim lemsateper," ta Lenamon-isa metetdaksü.

Tamalen Lifeway Christian Resources nung publisher Ben Mandrell-i, Blackaby ya Tsüngrem nisung ka aser Khrista temang atema minister ka liasü, ta ashi.

Southern California nung aliba Arogo ka nung Blackaby inyakba mapang nung Canada nung Khristan kati pa dang na Canada-i meyipa arua Saskatoon, Saskatchewan nung timtemba Arogo ka nung tenzükang, ta ayongzüka liasü.

Ajioda Saskatoon nung aliba Faith Baptist Church-i Blackaby aser pa kinüngtsü, Marilyn na dang par Arogo nung pastor inyaksü mepishiba ama tenati agizüka liasü.

Pa mezüng iba Arogoi

arudang Arogo nung züngsem ishika dang liasü, saka tangbo iba Arogoi mission Arogo 38 tenzüksüba den külemi Canadian Southern Baptist Seminary & College-a lapoktsüogo.

'Experiencing God' züludang pa den yaritepsang, Claude King-i, "Henry Blackaby-i Tsüngremi mapa inyakba tesem jangjatsü atema kü dak sayu aser pa den külemi tenzüksü asüngdanga liasü," ta ashi.

King-isa, "Tsüngrem sentong ka lir aser asenoki memetetba tesem nung Pai mapa inyaker. Kodang asenoki Tsüngremi mapa inyakba tesem jangjaba sülen Pa den külemi inyakdir Pai tesüngmangtsü mapa inyaker," ta ashi.

King-isa, "Pastor tem, missionary tem aser Khristan lenirtem aikati 'Experiencing God' kaket nung aliba tesayubatem ajang kanga temoatsü nguogo ta lemsatepogo," ta metetdaksü.

"Tsüngremi dang tejangja meteta alitsü. Nisung meyrjangsa meyrjangi 'Experiencing God' kaket azüngba ajang Tsüngrem tenzüksü tajaba jangjaogo. Henry ajang Tsüngremi Pai nisung ka tamang ajang inyaktetsü mapatem jungkai adoka sayu," ta King-isa.

Blackaby indang tesayubatemji talisa 'Experiencing God' kaket nung lir, ajisüaka 'Fresh Encounter' aser 'The Power of the Call' kakettem nunga Blackaby indang tesayubatem lir; item kakettem ajang TBM indang tenzükba wadang tajungba aküm, ta pai ashi.

TBM telok yagi mission organization akümtsü atema denominational programs dang agia liasü saka tangbo international organization akümtsü atema sayur.

Taoba mapang TBM nung executive director inyaksang, Bob Dixon-i, "Tsüngremi mapa inyakba tesem kodang asenoki bushi tenzükdir aser Tsüngrem tajaba metetdir asenoki meshisadangyonga wadang jangjatsü," ta ashi.

"Tebu Tsüngremi onok nem

wadang maneni agütsür aser onokia Pa dang nungi maneni wadang imlar," ta paisa metetdaksü.

Henry Blackaby-i, Experiencing God kaket ya 'kü taküm osang lir' ta lemsatepa liasü.

Pa Southern Baptist Convention indang North American Mission Board kübok Prayer & Spiritual Awakening Director liasü. Paisa Blackaby Ministries International tentet.

Lifeway Christian Resources Tir, Emeritus Jimmy Draper-i, "Henry ajang Arogo nung temelenshi adokdaksüba kodakeriang jangjatsü. Experiencing God kaket ajang Arogotem tuluka kongshiba ama ni tanga kakettemo memetet," ta metetdaksü.

"Henry-i Experiencing God kaket züluba sülen maneni kaket aika zülüogo, ajisüaka pa tenzükba wadang tamendakdakji iba kaket liasü. Atangji iba kaket ya Tsüngremi ajangshia Henry nem züludaksüba lir. Tanela asentenshitsü atema pai tejangraba tulu nung inyakba atema pa kodanga mamadoktetsü. Kibuba alimai maru tashi iba kaket ajang Arogotem maneni kongshitsü," ta Draper-isa metetdaksü.

Henry Blackaby ya 1935 küm April 15 nü British Columbia nung aso. Pai kinüngtsü, Marilyn den chirnur pongu aser semchi 14 toktür pilar.

Henry Blackaby'er chirnur ponguprongla Tsüngrem tenzükba wadang nung lir; Richard Blackaby, Atlanta nung aliba Blackaby Ministries International nung inyaker; Thomas Blackaby Maple Ridge, BC, Canada nung aliba Maple Ridge Alliance Church nung pastor inyaker; Melvin Blackaby Jonesboro, Georgia nung aliba First Baptist Church nung pastor inyaker; Norman Blackaby Marshall, Texas nung aliba East Texas Baptist University nung professor inyaker aser jala Carrie Blackaby Webb-a Blackaby Ministries International nung inyaker.

## ANOGO ABEN TSÜNGREM DEN

## Ain, Tetsübu masü

Tsüngremi asenok nem tetsübu tanela masü saka ain aser temeim aser tazüokba tanela agütsü.

- 1 Yohan 1:7

Khristan taküm nung Tsüngrem dang tsübuttsü Tsüngremi ajangshir (2 Kor. 5:10-11; Ibr 10:31). Nisung tsübuttsü Tsüngrem nungi aruba masü. Tebilemetsüji Khristan aikati Tsüngrem masü nisung tali tsübur. Parnok tetsübu jagi parnok Tsüngrem den tesendaktep tsükdanger kechiaser parnoki Tsüngrem masü nisung peladaksütsü bushidang parnok mapang lalur.

Timoti asangur ka liasü aser yimya nung tasü mait liasü aser temang nunga tashi mait liasü (1 Tim. 5:23). Pai Paul teti obendang dak notakba aser rishikangshiba metetta liasü. Paa timatemtsü aser kasaji rishikangshitsü ta pai metetta liasü. Pauli Timoti dang nisung tsübuttsü Tsüngrem nungi aruba masü ta ashi.

Nisung tsübuttsü jagi asenoki anemer. Tsüngremi asenok dang inyaksü ashiba tejangjaji kechi ta asüngdangdaksür. Rishikangshi maru tashi asenoki tashi angaba nung asenok temulung lema alitsü akok; tang arendaker; asenoki atangji Tsüngrem nungi angashia ali asü mali. Tetsübu timba memetetba tetsübu lir. Asenok jakdang kechi lir asenoki memetet, anungji asenoki ratamatar. Asenok tebilemba agi asenoki mokoktetsüsa tebilemetsü adokdaksütsü akok. Mapatem tejangja angatetsü asoshi tangatetsü shisatsü asenoki nungdaker. Iba jagi mapatem Tsüngremi anguba ama asenokia angutsü asoshi Pai asenok nem Tanela Temeshi agütsü.

Tetsübuttsü Tsüngrem dang tashi mangaba jenokdak ka masü. Kodang ne dak tashi tait Tanela Temeshi lidir tsübuttsü kuli kecha mali. Tetsübuttsü na alar kümdaksür saka na nüji kümdaksütsü asoshi Khrista aru. Tsüngrem dang nai ajuruba tetsübu ajang nungi nüji kümdaksütsü asüngdang. Pai ne tetsübu tia jungkai adoktsüba ama, Pai na maneni tashi angaa lidaksütsü.

## Franklin Graham indang UK tour agitsü anogotem sangdong

**February 14, 2024:** America nung sayutsüngir, Franklin Graham-i maneni UK semdanga 'God Loves Your' tour agia Tsüngrem temeim osang lemsateptsü.

God Loves You Tour UK ya June 15 nü Birmingham nung tenzüksü, iba sülen June 22 nü Glasgow nung agitsü, ta Billy Graham Evangelistic Association (BGEA)-i metetdaksü.

Sangküm June 21 nü London ExCel nunga iba sentong agitsü.

2022 küm Franklin Graham-i London, Liverpool, Sheffield aser south Wales nung 'God Loves You Tour' tenzükba liasü aser yaküm-a pai London semdanga iba sentong agi.

Nüngtugu sayutsüngir, asür Billy Graham'er jabaso Franklin Graham ya Samaritan's Purse nung CEO aser Billy Graham Evangelistic Association (BGEA) nunga Tir lir.

"UK nung aliba nüburttem den tongmelang agi Tsüngrem temeim osang lemsateptsüji

tang mapang ya kanga tapet. Tenyaba wadang tongtibang inyakba atema onoki Arogotem dang pelar. Arogotem den longjemer inyakba aser parnok nungitba ya onok asoshi akhümket," ta Graham-i metetdaksü.

"2025 küm June 21 nü ExCel London nung ayongzüka sentong nung adentsü atema ni nenok ajang jaoker. Iba sentong atema onoki sarasademba, sentong yangluba aser renemshiba nung nenok nem-a shilem agidaksüner," ta pai metetdaksü.

"London ya kanga tongtibang tesem ka lir. Ibayongji onoki tang agi tasembenbuba iba yimti nung God Loves You Tour agitsü. Alima nung iba ama tongtibang yimti ka nung osangtajung nungdang aser osangtajung atema tzülar," ta paisa metetdaksü.

Iba tour atema BGEA-i UK nung aliba Arogotem den longjemer inyaker.

AO OSHI ANGAZÜKDAK: TANÜ ANGAZÜKTSÜBA OJANG



Shizük

(v) angazükba, meteta akümba (learn)

\* Oboula dang nungi onoki molok ataksü shizük.

Shizük

(v) sü mesüra kaket maloka aliba agizük, sü mejezük, sü abena aliba agizük

\* Makokbai kaket nungi tapak ka shizük aser tangar sü shizüka endoktsü.

OLONG PAITEP # 6698

Grid for crossword puzzle #6698 with numbers 1-16.

TIPIEN

- 1. Anenzükdak ki - (5)
3. Asür mangyimba - (5)
5. Temlung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temlungjang tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

LANGTSÜNGLEN

- 1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünüsenbongtsü adokdak - (3)

OLONG PAITEP # 6697 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüngjem, 25. Süra.

LANGTSÜNGLEN :

- 1. Khu, 2. Sүjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

NAI-A YA METETTER MA



Netherlands nung taoba Prime Minister Dries van Agt-i pa kinungtsü Eugenie den teka amteper legal euthanasia ajanga asü. Tenaprong ya arishi küm 93 liasü aser Agt'er tasoli Nijmegen nung tan ita tetenzüklen asü. Iba osang ya Agt ajanga tentetba human rights organisation Rights Forum ajanga metetdaksü. Agt aser pa kinungtsü Eugenie na mapang talangka temang mejungi dang aru aser iba jagi tena külemi asütsü lemtet. Dries van Agt-i 1977 aser 1982 tsüngda Netherlands nung prime minister inyak aser pa ya Christian Democratic Appeal party nung mezüngbuba lennir liasü.

2019 küm Agt-i brain haemorrhage ajuru aser iba nungi pa taneptsü mangu aser pa kinungtsü tenaprong kanga shiranga liasü saka tena kati ka metoktsünüba agi legal euthanasia mulungtet ta Rights Forum-isa metetdaksü.

Netherlands nung "duo euthanasia" ya kanga bulua inyaker. 2022 küm apuani 29-i iba lemtet agia asü. 2021 küm apuani 16 aser 2020 küm apuani 13-i "duo euthanasia" mulungteta süogo.

BJP-i ED, CBI amshia Congress MLA tem anentsür



Guwahati, February 14, 2024

(Agencies): BJP sorkari ED, CBI aser tanga agency tem nem bushisüngdang sүdaksütsü ta amokmerena Congress MLA tem party nungi anendaksür ta Assam Assembly nung Leader of Opposition aser Congress lennir Debabrata Saikia-i ashi.

MLA Kamalakhya Dey Purkayastha aser MLA Basanta Das nati Himanta Biswa Sarma'er sorkar pusemba sülen Saikia-i iba olen jembu.

"Chief Minister-i Congress MLA tem party nungi anendaksütsü meranger. BJP-i ED, CBI aser tanga agency tem amshia par party nung nisungtem dendaksür. Tawa ED, GST aser tangartemi ozü

MLA Kamalakhya Dey Purkayastha anema bushisüngdang tenzükogo" ta pai ashi.

"Ozü zүngsemtem dak tai tongloktsüra parnok anema bushisüngdang asütsüla aser aibelenba putetra merenshiang ta onoki teti shia arur. Parnok BJP nung denra parnok aibelentem tatok agütsütsü aser tekong merangra ken o tiyazütem benoker ED, CBI, Vigilanceajanga merenshir. Iba ya democratic linük ka nung magizükur" ta Saikia-isa ashi.

Kamalakhya Dey Purkayastha aser Basanta Das nati tamasa tena constituency tem nung alir den asüngdangteptsüba asü

kechiyong parnoki tena Congress candidate tem ama shimtet, ta paisa metetdaksü.

"Tanü ozü MLA Basanta Das aser working president Kamalakhya Dey Purkayastha nati sorkar maparen pusemstü ta shiogo. Tenati constituency nung alirtem den tamasa asüngdangteptsüla kechiyong parnoki Congress candidate tem ama shimtet. Tenati BJP ideology anema noktakba atema takok angu. MLA akümba sülen kodaser yamai inyaker, tenati bilemdangtsüla" ta Saikia-isa ashi.

Bodbarnü Purkayastha aser Das nati Assam Chief Minister pusemba metetdaksüba ajanga Congress aoksadaksüogo. Purkayastha-isa Congress party nung working president mapa toktsü saka primary membership magien.

Lok Sabha elections matongdang Congress lennir aika Bharatiya Janata Party (BJP) nung denogo.

January 28, 2024 nü Assam Youth Congress president nungi anentsür Ankita Dutta aser taoba MLA Bismita Gogoi nati BJP nung aden.

Meghalaya-i India-Bangladesh arrtsü atsü dangtsü ayongzükur

Shillong, February 14, 2024

(Agencies): Meghalaya sorkari Centre dang India-Bangladesh international border atsü dangtsü ayongzükogo.

Meghalaya sorkari Ministry of Home Affairs (MHA) dang India-Bangladesh arrtsü atsü dangtsü shidi ka zülüogo.

"State sorkari MHA dang

Meghalaya nung India-Bangladesh arrtsü atsü dangtsü ayongzükogo" ta Meghalaya deputy chief minister Prestone Tynsong-i ashi.

India aser Bangladesh tsüngda zero point anasa atsü atsü dangtsüla, ta pai ashi.

Northeast kübok Meghalaya-i Bangladesh den

kilometre 443 agi arrtsütepa lir.

Centre-i India-Myanmar arrtsü atsü dangtsü lemtet agiba mapang ka nung Meghalaya sorkari iba takhangba agütsüogo.

India-i Myanmar den kilometre 1643 agi arrtsütepa lir aser iba ya Northeast state pezü den lir.

Assam Congress-i Lok Sabha menden 5 atema candidate shim

Guwahati, February 14, 2024

(Agencies): Congress party Assam unit-i Lok Sabha election atema constituency 5 nung candidate tem shimogo ta Assam Congress president Bhupen Borah-i ashi.

Assam nung Lok Sabha constituency menden 14 lir. Iba nungi Congress-i menden 5 atema candidate tem shimogo. Parnoki tanüngba menden 9

nungi kar United Opposition Forum Assam (UOFA) nem agütsütsü imlar.

"Constituency 14 nungi applications 70 tema aru. Ozü screening committee-i constituency 5 nungi candidate ka shimogo" ta Assam Congress president Bhupen Borah-i ashi.

"Tanüngba menden 9 nung nisung anana lir. Menden karbo UOFA nem lemezüktsütsü akok"

ta pai ashi.

February 20 tashi nung tanüngba constituency 9 atema candidate lemtet agitsü ta Assam Congress president-isa ashi.

Tesüiba nung UOFA nung adener Aam Aadmi Party (AAP)-i Dibrugarh, Guwahati aser Sonitpur Lok Sabha constituency 3 atema candidate shimba osang metetdaksüogo.



February 13, 2024 nü Central YMA Committee Room nung NGO Coordination Committee senden ka amendang agiba noksa angur. Iba senden nung Centre sorkari India-Myanmar arrtsü shibangtsüba aser Free Movement Regime (FMR) agienba anema lungkak aittsü lemtet. CYMA President aser NGOCC Chairman Pu Lalhmachhuana menden ser amenba senden nung February 21, 2024 nikongdang 1:00 ako nung Vanapa Hall nung lungkak aitiba sentong ka agitsü telemtetba agi.

## Maldives-i bendanger 186 meindok, India nunger 43 dena lir

**Male, Tsüklai/February 14 (Agencies):** Mapa tamajung inyak ta tai tongloksüba sülen Maldives-i India nunger 43 pei linüki meyipa yokogo, ta Male nung aliba news outlet Adhadhu osang ka ajanga ashi. Osang ajanga ashiba agi, Maldives administration-i linük 12 nungi bendanger 186 meindok, saka China nungibo kata meli.

Nisung timba meindokba ya Bangladesh nungi lir. Bangladesh nunger 83 meindok, iba sülen India nunger 43, Sri Lanka nunger 25, Nepal nunger 8. Parnok meindokba anogo ya memetet.

Linük nung ozüing alema business inyakba nungi aazükba sen bendanger indang bank account nung inokba business shibangtsütsü meranga mera

agir ta Maldivian home ministry-i sangdongba sülen bendangertem pei linüki meyipa yoktsüba osang ya angazüker.

Maldivian homeland security minister Ali Ihusan-ia par office ya finance ministry den külemi tenüing balala kübok 'illegal businesses' inyakba anema operation agir, ta shia liasü. Register süa aliba kiburtemi masü saka bendangeri lapokba business ya 'illegal businesses' küboki aiter ta pai ashi.

Bendangeri lapoka aliba business südi ta registrar-i bilemra iba amala business ji December 2021 nung yangluba ozüing ka kübok anentsütsü ta ashir.

Bendanger nisung 186-i mapa tamajung inyak aser parnok Maldives nungi

meindokogo, ta Maldives immigration controller Shamaan Waheed-i ashi.

Tir tasenba Mohamed Muizzu kübok Maldivian administration tasenba ya China den tesendaktep yanglur. Indian Ocean Region (IOR) nung China tetsüing ajemoktsü meranger. Muizzu yimsüsüba mendeni arudang bendanger shinga nema Maldivian foreign policy matsüshidaktsütsü ta nangzüka liasü. Ibai tenüing teta meshiaja India dak rangloker jembiba lir.

Tir menden nung amenba sülen Muizzu-i India dang Maldives nung aliba sepai ajunga anizüker aotsü ashi. Senden aika amenba sülen India-i sepai melena Maldives nung civilian ayutsü mulunga liasü.

## Pakistan: Sorkar kumtetsü atema PML-N aser PPP longjemogo

**Islamabad, Tsüklai/February 14 (Agencies):** Pakistan nung Nawaz Sharif aser Bilawal Bhutto Zardari nati aniba party ana sorkar kumtetsü atema longjemogo.

Pakistan People's Party lenir Bhutto-i ashiba agi, par party-i Ato Kilonser ka shimtsü atema Sharif-i aniba Pakistan Muslim League party nem teyari agütsütsü.

Party ana ya longjemer 2022 küm Imran Khan ato kilonser menden nungi atsüngtoka liasü aser pa tang tepuokdak lir.

Taküm election nung Pakistan Tehreek-e-Insaf (PTI)-i teyari agütsüba independent candidate temi meimlai menden timba koka liasü.

PPP lenir Asif Ali Zardari-i osangbenertem den sensaksemba mapang ashiba agi, par party aser PML-N election nung balala toktep,

ajisüaka linük tejangraba apir longjemtsü asoshi telemtetba agiogo.

"Teti dang rara alitsü nüngdaka mali," ta Zardari-i ashi.

Kasa mapang nung PML-N-ia, linük nung yimden yimsüsüba tamendakdak akanga toktsütsü atema party anapronglai teka amteper inyaktsü mulungtepogo.

Taoba hopta election nung PTI-i teyari agütsüba independent temi menden 266 nungi 93 koka liasü, aser iba ajanga koba party-i sorkar kumtetsü ta nüburtem bangkatapa liasü.

Election nung PML-N-i menden 75 aser PPP-i menden 54 koka liasü.

Iba den benden bendenloksema party tem nem tetsür aser non-Muslim nungertem atema mekazüka tokja aliba menden 70 bendenloktsütsü. Menden talila

ya independent candidate tem nem magütsütsü.

PML-N lenir Marriyum Aurangzeb-i ashiba agi, party lenir Sharif-i pa tenu Shehbaz ato kilonser inyaktsü atema benoktsü sentong lir. Tenapronglai taoba mapang PM mapa benogo.

Election dak sendakba nung Khan-i aniba party-i inyakyim nung ochi mashi sendaka lir aser parnoki ken o benoktsü sentong lir ta shiogo.

Election agiba sülen okadak osangbenertem den mezüngbuba sensaksemba mapang Khan-i, "Vote auyar sorkar kumtetsü ana nung aliba tekümdangtsü indang ni metetdaksüogo," ta ashi.

"Iba amala ochi mashi inyakyim ya lisopurtem aküm metsübuba temaitsü dang masü saka iba ajanga linük rongsenketzüing tamajungba kümdaktsütsü," ta paisa shisem.

## US Homeland Security Secretary anema ken o benoktsü

**Washington, Tsüklai/February 14 (Agencies):** House of Representatives ajanga tera agi Homeland Security Secretary Alejandro Mayorkas anema ken o benoktsü lemtetogo, anungji küm 150 jungnüa nung ken o benoker cabinet züingsem pa mezüngbuba akumer.

US-Mexico arütsü ajanga migrant aika aitba atema Republican telok nungi aikati Mayorkas tenüing asener.

Mayorkas anema ken o benoktsü taoba hopta merangba nung nung tamakok ajurba sülen Mongulbarnü Republican züingsem timba aliba chamber nung iba mera agütsü atema vote 214-213 agüja liasü.

Iba ken o tang Democrats timba aliba Senate-i aor, kong malemtetsü amai lir.

Mongulbarnü Tir Joe Biden-i iba vote agitepba ya constitution den mapet mapa ka lir aser "political stunt" ta ashi.

Mayorkas-i tenangzüka agidang mapa ajemalua shidak inyaktsü nangzüka ama meinyaki arütsü wazüka ayutsü asoshi mapa junga meinyaktet, ta pa anemer temi aitsür.

Iba vote ya timba party tsüingta lemdanger liasü, kong Democrats züingsem 210-i iba impeachment anema vote agütsü aser Republican nungia Tom McClintock (California), Ken Buck (Colorado) aser Mike Gallagher (Wisconsin) nungeri anema vote agütsü.

Mayorkas anema ken o benoktsü atema mezüing vote agitepba nunga par aseme memulungi liasü aser mapa tamajung meinyaker ka anema ken o benokba ajanga constitutional penalty tashi maitba kümdaktsütsü aser arütsü nung mepetmesü adoka aliba atema kecha masütsü ta shia liasü.

2021 nungi tenzüka migrants million 6.3 dak tema ozüing

alema US nung aita lir, anungji November ita election agütsü lia immigration ya ken o tamajung aser tesashi ka kümdaktsür.

Iba ken o ya US tir menden nungi Biden atsüngdoktsü asoshi Donald Trump-i kanga sashia rangloker nübu ayimer.

Vote agiteper mapang tatsüka lir Biden-i sangdong ka agütsüba nung Mayorkas bhukuma jembiba aser pa ya nübur tenzüker tajung ka lir ta ashi.

"Pai rule of law ajemalua wazüka ayu aser asen linük tamaren kümdaktsütsü mapa nung pai bendanga agütsür inyak," ta Biden-i ashi.

Republican temi asen arütsü nung timtem tulu adoka aliba bentetsü asoshi inyaktsü melena constitution nung ajemshia mapang indoker, ta Department of Homeland Security atema odongtar Mia Ehrenberg-i ashi.

(Maneni tapak 8 nung...)

## OFFICE OF THE CHUCHUYIMLANG WATSÜ TELEN MOKOKCHUNG

MOKOKCHUNG-798601 : NAGALAND

### TENÜNGSANG AGÜTSÜR



Alima renloktsü aser nüboritem meima sorkar tenzüka wadang nung Watsü Dr. Sentitula IFS, Divisional Forest Officer, Mokokchung, sorkar nungi Award of Governor's Gold Medal sempet tulu anguba asoshi Tsüngrem tenüing sanga Chuchuyimlang Watsü Telen Mokokchung ajanga konang aser tetushi tulu agütsür.

Sd/-  
Wt. Tatongkala  
President, CWTM

Sd/-  
Wt. Imwatila  
General Secretary, CWTM

### Exciting Job, Internship and Fellowship Opportunities

#### FOR SCHOOL TEACHER

Calling all graduates Fresh or Experienced candidates looking for better opportunities.

Go to this link for more information:

<https://bit.ly/BEF2024F>

Brought to you by Bridges Educational Foundation

Regd: Ministry of Corporate Affairs New Delhi

LAST DATE – 20<sup>TH</sup> FEB. 2024

## Ukraine-i Russia indang warship ka raksatsü

**Kyiv, Tsüklai/February 14**

**(Agencies):** Ukraine-i

sangdong ka ajanga Russia-i atsünger aliba Crimea tesem nung parnok sepaitemi Russia nung indang warship ka kanga mejungi raksatsüba osang metetdaksüogo.

Ukraine indang armed forces-i Bodhbarnü ashiba agi, parnoki naval drones amshia amakba mapang Tsezar Kunikov landing ship raksaja liasü.

Ukraine indang military tekolak tasenbai raraba tesemtem semdanga aoba mapang tang iba rong ya maka raksatsüogo.

Military-i Telegram messaging app ajanga ashiba agi, defence ministry intelligence den longjemer iba rong makogo, koba Alupka anasa Ukraine indang tziyim nung anena liasü.

Ukrainska Pravda media outlet-i, video sayuba nung Crimea anüolen tziikum nung mokozü tanak adokba aser tziyim kolak nung helicopter tem yimzüa aliba nguogo.

Ukraine-i ita ishika tsüingda Black Sea nung Russia nung indang rongtem maka arudar. Russia nung indang rongtem anüolen tziyim nungi mintokba ajanga shishilembadang amshiba lenmang tongtibang ka lapoktsü.

February ita Ukraine nung sepaitemi tziyim nung amshiba drone tem amshia Russia nung indang warship ka raksatsüogo.

Maneni ali nunga linük ana arrtsü adena anüing nungi kati ka maktepa arudar.

Manger mesangwa tsüingda Russia-i eastern Donetsk region kübok Selydove jila missile aika amshia makogo aser iba mapang nisung asem tepsetba den nisung ter dak tema yirutsüogo aser mozüki ka aser nisung aliba ki aika raksatsüogo, ta Ukraine nung ketdangsurtemi ashi.

Donetsk Governor Vadym Filashkin-i Telegram messaging app ajanga ashiba agi, jila kübok mozüki raksar aliba nungi shiranger 100 aninogo. Ponguben tashi atongtepa sür aliba nisung aliba ki ka nung apartment aika raksatsüogo, ta pai ashiba den tanur ana densema nisung pezü tashi yiruogo.

Kasa mapang nung Russian state agency RIA-i sangdong ka ajanga ashiba agi, Moscow indang air defence system temi, Belgorod aser Voronezh tesem aser Black Sea nung Ukraine-i yokba drone teku tashi raksatsüogo. Russia aser Ukraine napronglai nüburtem dak rangloker tesem kecha mamaker ta shia arudar.

Ukraine indang military chief tasenba Oleksandr Syrskiy-i tesem balala semdangba mapang tensa ya kanga tebenja ta shiogo. Pa meina Defence Minister Rustem Umerov oa liasü.

### Khelo India University Games ajungkettsü atema Half marathon asemtsü

**Dimapur, Tsüklai/February 14 (TYO):** Kohima Municipal Council Administrator, T. Lanusenla Longkumer-i sangdong ka ajanga, February 17 nü Phoolbari nungi High School junction tashi half marathon ka asemtsü ta metetdaksüogo. Kohima nung February 22 nungi 25 tashi Khelo India University Games 2023 (Wrestling) asayatsü aliba dak sendakba nung tangazükba agütsüser aser yimti ajungmesotsü nükjidong nung iba asaya ayongzükogo.

Ward Chairmen ajak dang, tejanrartem iba asaya nung shilem agidaksütsü atema ajungshitsü asoshi iba sentong indang pei kiyong nung metetdaksütsü tetuyuba agütsüogo. Marathon ya anepdang 6:30 ako nungi tenzüksü.

### ICC ODI all-rounder Rankings nung Nabi-i Shakib ajatetogo



Mohammed Nabi

**Tsüklai/February 14, 2024 (Agencies):** Afghanistan nunger all-rounder Mohammed Nabi- Bodhbarnü otsü tasen ka yanglua ICC ODI all-rounders' list nung temaba jenjangi atuba asayar tambusang kümogo. Pai Shakib Al Hasan ajateta temaba jenjang tongtetogo. Shakib ya mapang talangka No.1 jenjang nung liasü.

Nabi ya ashir küm 39 aser ita ka lir aser pai Sri Lanka den Afghanistan pur mezünguba ODI asayaba mapang kanga

junga asaya No.1 jenjang tongtetogo. Iba asaya nung pai run 136 yanglu aser wicket 1 agia liasü.

Iba alizüng tongtetba ajanga taoba mapang Sri Lanka nunger asayar Tillakarantne Dilshan-i otsü tasen ka yanglur aliba ajatetogo. Dilshan-i 2015 küm June ita arishi küm 38 aser ita 8 asüba mapang temaba jenjang tongteta liasü.

Bangladesh all-rounder Shakib-i Rashid Khan ajateta, pa 2019 küm May 7 nü nungi

tenzüka anogo 1739 tashi temaba jenjang nung liasü, koba ODI all-rounder rankings nung temaba jenjang nung mapang talangtiba aliba lir.

Ajisüaka pa tawa yiruba ajanga junga masayatetba den Nabi kanga junga asaya aruba ajanga rangkings nung temelenshi adokogo.

Test asaya nung kecha temelenshi mali aser India nunger bowler Jasprit Bumrah maneni temaba jenjang nung lir. Ravindra Jadeja, shiba England den Brehostibarnü nungi tenzüka tasembuba Test asaya nungbo asayatsü atema renemer lir pa Test all-rounders' rankings nung temaba jenjang nung lir.

ODI bowling rankings nung South Africa nunger spinner Keshav Maharaj maneni temaba jenjang nung lir. Kasa mapang nung Sri Lanka nunger asayar Wanindu Hasaranga (jenjang 14 tejakdangi tua 26buba) aser Dilshan Madushanka (jenjang asem tejakdangi tua 33buba) na Bodhbarnü sayaba rangkings nung tejakdangi tuogo.

### Rajkot Test atema England team sangdongogo

**Tsüklai/February 14, 2024 (Agencies):** India den Rajkot nung tasembuba Test asayatsü anogo ka lia, England-i Bodhbarnü iba Test atema asayartem sangdongogo.

England team nung asayar aikabo memelenshi aser Visakhapatnam nung tanabuba Test asayaba team nungi asayar ka dang melenogo.

Team nung spinner Shoaib Bashir melena England-i paceman Mark Wood shimogo. Rajkot nung tasembuba Test ya team

anaprongla atema kanga tongtibang lir.

Tetsür pongu asayatsü aliba asayamung nung tang tashi team anapronglai asaya kaka koker lir.

"Mongolbarnü nungi tenzüka Rajkot nung India den asayatsü aliba tasembuba Test atema England team sangdongogo," ta England aser Wales Cricket Board-i sangdong ka ajanga metetdaksü.

"Three Lions-i asayar ka melenogo aser Shoaib Bashir melena Mark Wood asayatsü,"

ta kasa sangdong ajanga metetdaksü.

Kasa mapang nung England captain Ben Stokes atema iba asaya ya alizüng tasen ka tongtetba asaya asütsü. Iba Test asaya ya pa atema Test 100buba asütsü.

England team nungi asayartem:

Zak Crawley, Ben Duckett, Ollie Pope, Joe Root, Jonny Bairstow, Ben Stokes (c), Ben Foakes, Rehan Ahmed, Tom Hartley, Mark Wood, James Anderson.

### UWW-i India nem tenokdangba agütsür aliba agintsüogo

**Tsüklai/February 14, 2024 (Agencies):** United World Wrestling (UWW)-i Mongolbarnü Wrestling Federation of India (WFI) nem tenokdangba agütsür aliba agintsüogo aser iba ajanga India nunger asayartem linük tenüng nungi asayatsü melatsü.

Election mapang shitak nung magiba atema ita trok tashi suspend sütsür aliba sülen UWW-i tenokdangba agintsüogo. Tenokdangba agütsür aliba agintsü asoshi

tenangzüktepba yangluba kübok WFI-i, asayar tem ajak kecha tebandang makai asayadaksütsü asoshi asadangtsü ta tenangzükba ka tezülba nung UWW nem agütsüsüla, ta shia lir.

"Taoba tir anema longkak aitba asayar asem densema asayar shinga menenmetui mamshitsüla," ta Vinesh Phogat, Bajrang Punia aser Sakshi Malik nunger tetshia UWW-i ashi. Par asemi anir Brij Bhushan anema longkak aita

liasü.

Indian Express den jembiba mapang WFI president Sanjay Singh-i, April ita Olympic qualification tournament atema trails nung shilem agitsü atema pai asayar asem ya jaoktsü, ta ashi.

Sanjay ya tir asütsü atema shimba sülen Sakshi asaya nungi anenogo, Vinesh-i tawa National Championship nung gold medal nguogo aser Bajrang tang Russia nung iba trail atema renemdar.

**Nagaland Olympic and Paralympic Games 2024**

MEDAL TALLY DAY 3

14 FEB, TIME: 05:00 PM

STRONGER TOGETHER

SL	DISTRICT	GOLD	SILVER	BRONZE	TOTAL
1	Peron	7	3	3	13
2	Kohima	6	9	4	19
3	Dimapur	6	4	8	18
4	Phek	6	2	4	12
5	Chümoukedima	5	8	7	20
6	Mokokchung	3	1	6	10
7	Mon	1	4	7	12
8	Longleng	1	-	3	4
9	Niuland	1	-	3	4
10	Shamator	1	-	2	3
11	Wokha	-	3	9	12
12	Noklak	-	1	1	2
13	Tuensang	-	-	2	2
14	Kiphire	-	-	1	1
15	Tseminyu	-	-	-	-
16	Zunheboto	-	-	-	-

### BATC: India tetsür team-i China koka quarter-i iogo

**Tsüklai/February 14, 2024 (Agencies):** India tetsür badminton team-i tang asaya aliba Asia Team Championships nung top seed China team 3-2 agi koka group stage nung temaba jenjang nung quarterfinals-i iogo.

Team ana tsüngda asaya pongu asayatsü liasü aser mezüngbuba kija asaya nung PV Sindhu-i China tsür Han Yue koka liasü.

Sindhu shiba ita asem dak tema nung professional asaya ka danga asaya mali, lai iba asaya ya 21-17, 21-15 agi koka India team 1-0 agi tejakdang aküm.

Ajisüaka mapang tatsüka dang lir tanabuba asaya nung China team nungi tarep asayar Lui aser Tan na India tsür Ashwini Ponappa-Tanisha Crasto na 21-19, 21-16 agi koka tema anaprongla 1-1 aküm.

Iba sülen maneni China tsürtemi kanga junga asaya kija asaya tanabuba nung Wang Zhi Yi-i India tsür Ashmita Chaliha straight sets nung 21-13, 21-15 agi akok aser 2-1 agi parnok tejakdang aküm.

Qualify asütsü atema asaya ana akoktsü nungdaka asayaba mapang India tsür Treesa aser Gayathri na dak India team maneni asayayonga aotsü atema timla ayu aser yamaji tenati asaya pezüububa nung Li aser Luo na den set asem tashi kanga meranga asayar asaya 10-21, 21-18, 21-17 agi koka liasü.

Takoker bendangtsü atema tasembuba kija asaya asayatsüsa aküm. India team maneni asayayonga aotsü atema lanur asayar Anmol Kharb dak keta liasü.

Iba asaya nung Khard aser Wu Luo Yu na set asem tashi kanga toktepa asaya liasü.

Mezüngbuba set nung kanga toktepa asayaba sülen Kharb-i 22-20 agi asaya akok. Ajisüaka tanabuba asaya nung Wu Luo Yu-i 21-14 agi Kharb ayong ayonga koka liasü.

Team ana prongla atema tasembuba set ya kanga tongtibang aküm, ajisüaka arishi küm 17 tain India tsürla yagi tajungba asayateta asaya 21-18 agi akok aser India team nem takok agüja liasü.

### BENDANGLI OSANG : Tapak 7 nungi...

#### US Homeland Security Secretary anema...

House nung Republican Speaker Mike Johnson-i Mayorkas anema ken o benoktsü langa lir, ta ashi.

January ita iba ken o anaben jembidang Mayorkas-i immigration policy mapa kuma meinyaktet aser arütsü nung security indang tiazi jembi ta Republican temi tai tonglokja liasü.

Texas nungi Democrat Al Green ya meimlai hospital scrubs agir chamber tonga nunger arua iba impeachment anema vote agütsü. Pa ya surgery agir emergency room nung munga liasü.

House Majority Leader Steve Scalise ya taoba vote mapang cancer anepaluba yong vote magütsüteti liasü, saka pa

shilangba ajanga Republican temi nungdakba vote nguteta liasü.

Sorkar ketdangsür kati mapa tamajung inyakba mech mapang nungi anentsütsü astema impeachment ya mera mezüngbuba lir, ta US Constitution nung shia lir.

Ken o benoktsü atema House nung simple majority nungdaker aser Senate nung ken o jembitsü aser yangji takok angutsü atema two-thirds majority nungdaker.

Ajisüaka iba maparen ya Senate majangtetsü amai lir, kong Democrats züngsem tera agi timba lir.

House-i impeachment articles ya Senate nung February 26 nü benoktsü.

### BILEMDANGANG "Shibai tangar dang sayur, pai jenti angazüker."